



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07 i 15/08), a u vezi sa članom 61. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21 i 1/22), Visoko sudsko i tužilačko vijeće Bosne i Hercegovine je na sjednici održanoj 07.07.2022. godine, donijelo

O D L U K U **o imenovanju sudije u Sud Bosne i Hercegovine**

- I. Za sudiju Suda Bosne i Hercegovine imenuje se Uzunović Sena.
- II. Imenovana stupa na dužnost 08.08.2022. godine.
- III. Ova odluka stupa na snagu danom donošenja i biće objavljena u „Službenom glasniku BiH“ i na internet stranici Vijeća.

O b r a z l o ž e n j e

Visoko sudsko i tužilačko vijeće Bosne i Hercegovine (u daljem tekstu: Vijeće) je dana 21.12.2021. godine, objavilo javni konkurs, broj: 04-07-3-4416-1/2021, kojim su, između ostalih pozicija, oglašene i dvije (2) pozicije za sudije Suda Bosne i Hercegovine.

Nakon provedene konkursne procedure, nadležno podvijeće je izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovníkom VSTV-a BiH, Vijeće je odlučilo da za jednu od dvije pozicije sudije Suda Bosne i Hercegovine imenuje kandidatkinju pod rednim brojem 1. na rang listi Uzunović Senu.

Vijeće je nakon ocjene stručne sposobnosti kandidatkinje zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, te druge aktivnosti u struci i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o Visokom sudskom i tužilačkom vijeću Bosne i Hercegovine.

Prema mišljenju Vijeća, navedenu kandidatkinju, između ostalih kandidata, prije svega izdvaja i preporučuje da bude imenovana za sudiju navedenog suda je ukupan broj bodova koje je ostvarila u konkursnoj proceduri.

Naime, imenovana kandidatkinja je u toku konkursne procedure ostvarila veoma dobre rezultate, kako u pogledu bodova ostvarenih za kriterij stručnosti, ukupno 100 bodova od mogućih 100 bodova, tako i u pogledu bodova ostvarenih na razgovoru, ukupno 21,5 bodova od mogućih 25 bodova, što ju je u konačnici rangiralo na prvom mjestu rang liste kandidata sa ukupno 121,5 ostvarenih bodova od mogućih 125 bodova.

Osim toga, Vijeće je imalo u vidu da je imenovana kandidatkinja u skladu sa članom 59a. stav (1) tačka c) Poslovnika VSTV-a BiH ostvarila potreban uspjeh od najmanje 115 bodova, kako bi bila predložena i imenovana na poziciju sudije Suda Bosne i Hercegovine.


Imenovanje navedene kandidatkinje, pored najviše ostvarenih bodova u konkursnoj proceduri, opredijelila je i činjenica što je i dugogodišnji nosilac pravosudne funkcije sa izuzetno uspješnim rezultatima rada za posljednje tri godine.

Vijeće je imalo u vidu i činjenicu da je imenovana kandidatkinja tokom svoje karijere, već obavljala sudijske poslove, i to u periodu od 1993. g. do 1996. g. obavljala je dužnost sudije u Okružnom vojnom sudu u Mostaru, Odjeljenje Konjic, u periodu od 1996. g. do 1998. g. obavljala je dužnost sudije u Višem sudu u Mostaru, a u periodu od 2001. g. do 2003. g. obavljala je dužnost sudije u Opštinskom sudu I u Sarajevu.

Pored navedenog, Vijeće je vodilo računa o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Imajući u vidu sve iznesene razloge, Vijeće je odlučilo kao u izreci ove odluke.

Broj: 04-07-3-2472-2/2022
Datum: 07.07.2022. godine



Dostaviti:

- Imenovanoj,
- Sudu Bosne i Hercegovine,
- Ministarstvu pravde Bosne i Hercegovine,
- a/a.